

唐書合鈔

唐書卷第十三

本紀十三

德宗下

貞元四年春正月庚戌朔上御丹鳳樓制曰朕以菲薄
託於王公之上恭承天地之序虔奉祖宗之訓遐想至
理思臻大和而誠不感物化不柔遠聲教猶鬱征賦仍
繁頃者務於安人不憚屈已與西蕃結好申以齊盟而
戎心不厭背義虧信劫脅士庶屢犯封疆元元何辜皆
朕之失乃者輦轂之下兇狂結構上帝垂祐悉自伏誅
刑以止殺諒非獲已今三陽布和萬物資始思與羣公
兆庶惟新政理宜敷在宥之澤以覃作解之恩可大赦

天下大辟已下罪咸赦除之

刺史予一子官增戶墾田者加階縣令減選九品以

上官言事

是日質明含元殿前階基欄檻壞損三十餘間壓

死衛士十餘人京師地震辛亥又震壬子又震壬戌以

左龍武大將軍王栖曜爲麟州刺史鄜坊丹延節度使

丁卯京師地震戊辰又震庚午又震以宣武軍行營節

度使劉昌爲涇州刺史四鎮北庭行軍涇原等州節度

使癸酉京師地震甲戌以華州潼關節度使李元諒兼

隴右節度使臨洮軍使乙亥地震金房尤甚江溢山裂

廬舍多壞居人露處陳留雨木大如指長寸餘有孔通

中下而植於地凡十里許二月辛巳李泌以京官俸薄

請取中外給用除陌錢及闕官俸外一分職田額內官俸及刺史執刀司馬軍事等錢令戶部別庫貯之以給京官月俸令御史中丞竇參專掌之歲得錢三百萬緡謂之戶部別處錢朝臣歲不過五十萬常有二百餘萬以資國用壬午地震甲申又震乙酉又震丙申又震甲辰太僕郊牛生犢六足又豕生兩首四足築延喜門北複道屬永春門涇原劉昌復築連雲堡三月戊申鹿入京師市門甲寅地震宴羣臣於麟德殿設九部樂內出舞馬上賦詩一章羣臣屬和己未地震丁卯有司條奏省官其左右常侍太子賓客請依前置四員從之庚午

地震詔涇原劉昌於平涼會盟所收被害將士骸骨葬於淺水原爲二冢立石堠志之題曰懷忠冢辛未地震中書省梧樹有鵲以泥爲巢夏四月癸巳以太子左庶子暢悅爲桂管觀察使改左右射生爲左右神威軍己亥福建軍亂逐觀察使吳詵大將郝誠謚自稱留後丁未隴右李元

諒築良原城

河南淮海地生毛

五月丁巳右龍武統軍張伯儀

卒辛酉以吉州刺史張庭

李昂傳作應

爲安南都護本管經

畧使升鄆州爲大都督府壬戌加置諫議大夫八員分中書四員爲右門下四員爲左檢校左庶子蕭復卒於饒州丙寅地震丁卯又震月犯歲星辛未太子賓客吳

湊爲福建觀察使乙亥熒惑歲鎮三星聚營室凡二十
日是月吐蕃寇涇邠寧慶鄜等州焚彭原縣邊將閉城
自固賊驅人畜三萬計凡二旬而退吐蕃入寇以秋冬
今盛暑而來華人陷蕃者道之也六月丁丑鄂岳觀察
使李竦卒乙酉以尚書左丞杜佑爲陝州長史陝虢觀
察使徵夏縣處士先除著作郎陽城爲諫議大夫城以
褐衣謁闕上賜之章服而後召己丑桂管都防禦觀察
使暢悅卒乙未以諫議大夫何士幹爲鄂岳沔黃等
州都團練觀察使己亥封皇子皇弟當作邕王諒等七
人爲王兼卿監祭酒等官

案代宗諸子大厯中盡封無
至貞元中始王者新書諸王

傳是年封憲宗以下十三王則
弟當作孫七人當作十四人

癸卯熒惑退行入羽林

秋七月庚戌

渾城爲邠寧慶副元帥

以左金吾將軍張獻甫爲邠

寧節度使陳許防禦兵馬使韓全義檢校工部尚書充
長武城及諸軍行營節度使癸丑邠寧軍因韓遊瓌受
代憚張獻甫之嚴乘其無帥縱兵大掠仍脅監軍楊明
義奏請范希朝爲帥都虞候楊朝晟斬其亂首二百餘
人方定朝命仍以希朝副獻甫己未奚室韋寇振武軍
壬戌詔以太尉中書令西平郡王李晟長子愿爲銀青
光祿大夫太子賓客賜勳上柱國與晟門並列戟乙丑
以前撫州刺史戴叔倫爲容州刺史兼御史中丞本管

經畧使以兵部尙書崔漢衡爲晉州刺史晉慈隰觀察使壬申詔嗣王郡王朝會班位在本官班之上左右庶子準令在左右丞侍郎之下諸司四品之上今在少卿之下非也宜改之乙亥以蘇州刺史孫晟

當從孫述傳作成

爲

桂州刺史桂管觀察使荆

字疑誤

河自陝州至河陰水色

如墨流入汴口至汴州一宿而復又汴鄭管內烏皆入

田緒李納之境啣柴爲城方十餘里高二三尺緒納惡

而去之信宿復如之烏口皆流血八月以權判吏部侍

郎吉中孚爲中書舍人乙酉檢校司徒兼太子太師汧

國公李勉薨甲午京師地震其聲如雷

灞水溢

九月丙午

詔比者卿士內外左右朕躬朝夕公門勤勞庶務今方
隅無事蒸庶小康其正月晦日三月三日九月九日三
節日宜任文武百僚選勝地追賞爲樂每節宰相及常
參官共賜錢五百貫文翰林學士一百貫文左右神威
神策等軍每廂共賜錢五百貫文金吾英武威遠諸衛
將軍共賜錢二百貫文客省奏事共賜錢一百貫文委
度支每節前五日支付永爲常式戊申晉慈隰觀察使
崔漢衡加都防禦使名癸丑賜百僚宴於曲江亭仍作
重陽賜宴詩六韻賜之羣臣畢和上品其優劣以劉太
真李紆爲上等鮑防于邵爲次等張濛殷亮等二十人

又次之唯李晟馬燧李泌三宰相之詩不加優劣庚申

吐蕃寇邠寧坊等州

邠寧節度張獻甫敗之

冬十月詔中書門下

選常參官曾爲牧宰有理行者以名聞宰臣奏于頔董

晉等十二人前任有治迹詔頔等於左右丞聽各言政

要左右丞條奏上乃御宣政殿親試其言而後用之丙

戌以右神策將軍李長榮爲河陽三城懷州團練使仍

賜名元戌子迴紇公主將妾媵六十餘人馬二千匹來

迎咸安公主命刑部尙書闕播送公主歸蕃十二月辛

巳少府監李觀卒

冬築夾城

五年春正月甲辰朔

日有食之

乙卯詔四序嘉辰歷代增置

漢崇上巳晉紀重陽或說禳除雖因舊俗與衆共樂咸
合當時朕以春方發生候及仲月勾萌畢達天地和同
俾其昭蘇宜助暢茂自今宜以二月一日爲中和節以
代正月晦日備三令節數內外官司休假一日宰臣李
泌請中和節日令百官進農書司農獻種稂之種王公
戚里上春服土庶以刀尺相問遺村社作中和酒祭勾
芒以祈年穀從之丁卯右散騎常侍宜城縣子柳渾卒
二月己丑貶京兆尹鄭叔則爲永州長史戊戌以滄景
留後程懷直爲滄景觀察使庚子以大理卿董晉爲門
下侍郎同中書門下平章事以御史中丞

新書寶參爲
大夫

中書侍郎同中書門下平章事兼轉運使以戶部侍郎
班宏爲戶部尙書依前度支轉運副使三月甲辰中書
侍郎同平章事李泌卒乙卯以兵部郎中姚南仲爲御
史中丞司農卿薛珏爲京兆尹以大理卿李速爲黔州
刺史黔中觀察使癸亥以資州刺史龐復爲安南都護
本管經畧使丙寅貶禮部侍郎劉太眞爲信州刺史以
給事中杜黃裳爲河南尹戊辰詔以李懷光外孫燕八
八爲左衛率府胄曹參軍賜姓名曰李承緒仍賜錢千
貫俾自營居業夏四月乙未以太子少師蕭昕爲工部
尙書致仕給半祿料永爲常式初致仕官只給半祿無

料上加以待老臣半料自昕始也五月戊辰宋州麥

一莖九岐者百餘本六月乙未以光祿卿裴腆爲桂管

觀察使

是夏吐蕃寇長武城韓全義敗之於佛堂原

秋七月以嗣滕王湛然

爲太子賓客入迴紇使八月辛未以同州刺史竇覲爲

戶部侍郎九月壬寅詔以褚遂良已下至李晟等二十

七人圖形於凌煙閣以繼國初功臣之像丙午西川韋

臯奏與東蠻合力大破吐蕃於故雋州

敗吐蕃於臺登北谷

擒其

將藏遮遮自是吐蕃挫銳竟復雋州冬十月庚午百僚

請復徽號不允己丑易定節度使檢校司空同平章事

張孝忠以擅出兵襲蔚州降檢校司空爲左僕射桂管

觀察使孫晟卒癸巳以戶部侍郎竇覲爲揚州長史兼

御史大夫淮南節度使

嶺南節度使
李復克瓊州

十二月庚午迴紇

汨咄祿長壽天親毗伽可汗卒辛未以淮南節度使杜

亞爲東都留守畿汝州都防禦使兵部侍郎裴謂爲河

南尹司農卿李翼爲陝虢都防禦觀察使壬申以陝虢

觀察使杜佑檢校禮部尚書兼揚州長史淮南節度使

六年春正月戊戌朔戊申大雪二月戊辰朔百僚會宴

於曲江亭上賦中和節羣臣賜宴七韻是日百僚進兆

人本業三卷司農獻黍粟各一斗岐州無憂王寺有佛

指骨寸餘先是取來禁中供養乙亥詔送還本寺丙戌

以中書舍人陸贄權兵部侍郎甲午以吏部侍郎劉滋
爲吏部尙書丁酉王武俊守棣州將趙鎬以郡歸李納
武俊怒以兵攻之三月庚子百僚宴於曲江亭上賦上
已詩一篇賜之王寅渾瑊自河中來朝戊午牂牁蠻來
朝甲子以旱日色如血無光夏四月甲申大風雷閏月

乙卯詔常參官畿縣令
言事免京兆府夏稅

庚申太白辰星聚東井戊午始

雨五月丙寅朔上御紫宸受朝上以是月一陰生臣子
道長父子必以是朔面焉故取朔日受朝壬午以寧州
刺史范希朝爲單于大都護麟勝節度使是夏淮南浙
東西福建等道旱井泉多涸人渴乏疫死者衆秋七月

丙寅淮南節度使竇覲卒

案本傳覲除淮南赴鎮旬日暴卒覲去年十一月除不應

至是七月始赴鎮況五年十二月壬申杜佑已爲淮南節度使矣此疑屬五年文錯簡於此

癸酉復

呼親王母曰太妃公主母曰太儀八月

辛丑殺皇太子妃蕭氏

丁

未工部尙書致仕鮑防卒九月乙丑收諸道進奏院官

印悉毀之己卯詔十一月八日有事於南郊太廟行從

官吏將士等一切並令自備食物其諸司先無公厨者

以本司闕職物充其王府官度支量給廩物其儀仗禮

物並仰御史搏節處分冬十月己亥文武百僚京城道

俗抗表請徽號上曰朕以春夏亢旱粟麥不登朕精誠

祈禱獲降甘雨旣致豐穰告謝郊廟朕尙因禋祀而受

徽號是有爲爲之勿煩固請也辛亥迴紇弔祭使鴻臚

卿郭鋒復命迴紇遣達北勒梅錄將軍來告九姓迴紇

登里邏沒密施羽錄忠貞毗伽可汗之喪十一月

戊辰朝獻

於太清宮已巳朝享於太廟

庚午日南至上親祀昊天上帝於郊丘

禮畢還宮御丹鳳樓宣赦見禁囚徒減罪一等立仗將

士及諸軍兵賜十八萬段匹今後刺史縣令以四考爲

限

文武官階勲爵葬戰亡暴骨者

青州李納以棣州還王武俊并其

兵士三千是歲吐蕃陷北庭都護府節度使楊襲古奔

西州迴紇大相頡干迦斯給襲古請合軍收復北庭乃

殺襲古

新書在七年九月案吐蕃傳當從新書

安西因是阻絕唯西州猶

固守之迴紇亦爲吐蕃所逼取浮圖川乃遷部落羊馬於牙帳之南以避之

七年春正月壬戌朔己巳襄王儼薨庚辰以湖南觀察使裴胄爲洪州刺史江西觀察使以常州刺史李衡爲潭州刺史湖南觀察使蔡州置汝南縣黑衣大食遣使朝貢以中書舍人韓臯爲御史中丞二月己巳

案是月無己巳

誤通鑑作戊戌

涇原帥劉昌復築平涼城城去故原州一百五

十里本原之屬縣地當禦戎之衝要昌浹辰而功畢分兵戍之邊患稍弭庚子侍中渾瑊自河中來朝三月辛酉陳許節度使曲環奏請權停當道冗官待一二年

後民力稍給則復之壬戌左龍武統軍戴休顏卒甲子
涇原節度使劉昌築胡谷堡改名彰義堡堡在平涼西
三十五里亦禦戎之要地壬申詔頃來賜衣文彩不常
非制也朕今思之宜有定制節度使宜以鵲銜綬帶觀
察使宜以鴈銜威儀威儀瑞草也關輔牛疫死十亡五
六上遣中使以諸道兩稅錢買牛散給畿民無牛者辛
巳詔神威神策六軍將士自相訟軍司推劾與百姓相
訟委府縣推劾小事移牒大事奏取處分軍司府縣不
得相侵癸未義武軍節度使檢校司空同平章事張孝
忠卒夏四月庚子太子少師致仕蕭昕卒汴州獻白鳥

戊午詔仲夏之時萬物敷暢陽德方茂陰事始承昔者
觀于法象因天地交會之序爲父子相見之儀沿習成風
古今不易王者制事在於因人酌其情而用中順其俗
以爲禮咸覲之義旣行於父子之間資事之情豈隔於
君臣之際申告卿士自我爲初起今年五月朔御正殿
召見文武百官外官因朝奏咸聽就列仍編禮式以爲
常典己未安南首領杜英翰叛攻都護府都護高正平
憂死五月庚申朔上御宣政殿見百官從新制也辛未
置柔遠軍爲安南都護府甲申端王遇薨許州獻白鳥
戊子以衡州刺史齊映爲桂管觀察使六月庚寅朔乙

已太常卿崔縱卒秋七月庚午以信州刺史鄭叔則爲
福建觀察使癸酉上幸章敬寺賦詩九韻皇太子與羣
臣畢和題之寺壁戊寅以邕王諲爲義武軍節度使易
定觀察等大使以定州刺史張昇雲爲留後庚辰以虔
州刺史趙昌爲安南都護經畧招討使八月己丑以翰
林學士歸崇敬爲工部尚書甲午給事中鄭珣瑜爲中
書舍人丙申貶宗正卿李翰爲雅王傅翰林學士陸贄
爲兵部侍郎罷學士庚戌夏州奏開延化渠引烏水入
庫狄澤溉田二百頃九月庚申兵部尚書致仕馬炫卒
冬十月癸丑每御延英令諸司官長二人奏本司事尋

又敕常參官每日二人引對訪以政事謂之巡對十一

月己丑令常參官趨朝入閣不得奔走周親已下喪者

禁慘服朝會須服本色綾袍金玉帶丁酉以前福建觀

察使吳湊爲陝州長史陝虢觀察使

戊戌睦王述薨

是冬無雪

八年春正月丙辰朔癸酉罷桂管經畧招討使二月丁

亥許州人李狗兒持杖入含元殿擊欄檻又格擒者誅

之庚子京師雨土己酉吏部尙書李紆卒三月乙丑山

南東道節度使檢校戶部尙書嗣曹王臯薨庚午

新書甲申

宣武軍節度使司徒同平章事劉元佐卒

其子士寧自稱留後

癸

酉劍南西川節度使韋臯奏請當道閒員官吏增其俸

祿從之

表丁丑竇參兼吏部尚書知選事

己亥以湖南觀察使李衡爲

洪州刺史江西觀察使襄州軍亂掠府庫民財殆盡都將徐誠斬其亂首楊清潭方止丙子以荆南節度使樊

澤爲襄州刺史山南東道節度使以江西觀察使裴胄

爲江陵尹荆南節度使以戶部尚書班宏判度支戶部

侍郎張滂爲諸道鹽鐵轉運使己卯以陝虢觀察使吳

湊爲汴州刺史宣武軍節度汴宋等州觀察使辛巳以

同州刺史姚南仲爲陝虢觀察使壬午以左庶子李允

爲京兆尹以蘇州刺史齊抗爲潭州刺史湖南觀察使

夏四月丁亥貶左金吾大將軍嗣虢王則之爲昭州司

馬左諫議大夫知制誥吳通元爲泉州司馬

新書殺左諫議大夫

知制誥吳通元

給事中竇申道州司馬戊子以雅王傅李翰爲

金吾衛大將軍翰前爲竇參所惡貶官至是參敗上遽召翰口授將軍便令金吾仗上事翼日除書方下庚寅以汴州長史劉士寧爲汴州刺史宣武軍節度使時吳湊行次汜水聞其有變而還乙未貶中書侍郎同平章事竇參爲郴州別駕竇申景州司戶尋杖殺申諸竇皆貶以尙書左丞趙憬兵部侍郎陸贄並爲中書侍郎同中書門下平章事丁酉韋臯請十二而稅以給官吏從之丙午以東都河南淮南江南嶺南山南東道兩稅等

物令戶部侍郎張滂主之以河內河東劍南山南西道
等財戶部尚書判度支班宏主之一遵大厯故事如劉
晏韓滉分掌焉給事中韋夏卿左遷常州刺史坐交諸

竇也是月吐蕃寇靈州五月乙卯朔上御宣政殿受朝

丙辰初增稅京兆青苗畝三錢以給掌閑驍騎戊午以

光祿少卿崔穆爲黔州觀察使己未大風吹壞廬舍門

闕

發太廟屋瓦

丙寅以大理卿王翊爲福建觀察使戊辰初

令授臺省官者各具舉主於授官詔先是郎官缺左右
丞舉之御史缺大夫中丞舉之詔書不具所舉及趙憬
陸贄爲相建議郎官不宜專於左右丞宜令尚書丞郎

各舉其可詔書具所舉官名御史亦如之異日考殿最

以舉主能否從之癸酉平盧淄青節度使檢校司徒同

平章事李納卒

其子師古自稱留後

癸未前太僕少卿劉士幹有

罪賜死劉元佐養子也六月

淮水溢

吐蕃寇涇州

吐蕃寇連雲堡

大將王進用死之

秋七月甲寅朔戶部尚書判度支蕭國公班

宏卒以桂管觀察使齊映爲洪州刺史江西觀察使以

翰林學士歸崇敬爲兵部尚書致仕辛巳大雨八月己

丑以天下水災分命朝臣宣撫賑貸河南河北山南江

淮凡四十餘州大水漂溺死者二萬餘人辛卯以青州

刺史李師古爲鄆州大都督府長史平盧淄青等州節

度觀察海運陸運押新羅渤海兩蕃等使丁未詔以歲
凶罷九日賜宴九月丁巳韋臯攻吐蕃之維州獲蕃將
論莽熱以獻貶太子賓客于邵江州別駕尋卒乙亥以
太子賓客薛珏爲嶺南節度使冬十月己亥追封皇弟
遐爲均王庚戌復命金吾置門籍十一月壬子朔日有
食之己巳貶右庶子姜公輔泉州別駕嚴震奏破吐蕃
於芳州庚午山南西道節度使嚴震及吐蕃戰於黑水堡敗之壬申詔自今死刑
勿決先杖是月幽州盧龍軍節度使劉濟及其弟瀛州刺史海戰於瀛州海敗奔於京師十二
月庚寅詔賜遭水縣乏絕戶米三十萬石甲辰獵於城東丁未
以給事中李巽爲潭州刺史湖南觀察使閏月癸酉門

下省奏郵驛條式應給紙券除門下外諸使諸州不得給往還券至所詣州府納之別給俾還朝常參官在外除授及分司假寧往來並給券從之甲戌牂牁室韋靺鞨皆遣使朝貢

九年春正月庚辰朔朝賀畢上賦退朝觀軍仗歸營詩乙酉劍南東川節度使王叔邕來朝癸卯初稅茶歲得錢四十萬貫從鹽鐵使張滂所奏茶之有稅自此始也甲辰禁賣劍銅器天下有銅山任人採取其銅官買除鑄鏡外不得鑄造二月庚戌朔先是宰相以三節賜宴府縣有供帳之弊請以宴錢分給各令諸司選勝宴會

從之是日中和節宰相宴於曲江亭諸司隨便自是分
宴焉易定留後張昇雲爲義武軍節度使辛酉詔復築
鹽州城貞元三年城爲吐蕃所毀自是塞外無保障犬
戎入寇旣成之後邊患息焉三月己亥以駕部郎中知
制誥張式爲虢州刺史夏四月辛酉地震有聲如雷河
中關輔尤甚壞城壁廬舍地裂水涌五月庚寅廢諸州
府執刀甲辰以義成軍節度使檢校右僕射賈耽爲左

新書

僕射同中書門下平章事以尙書左

新書

丞盧邁

本官同中書門下平章事

表趙憬爲門下侍郎

以鄭州刺史李融

爲滑州刺史義成軍節度使乙巳韋臯奏遣軍出西山

破吐蕃峨和城定兼城通鶴軍凡平堡五十餘所是日以蕃俘器仗來獻丙午以門下侍郎同平章事董晉爲禮部尚書罷知政事六月甲寅加韋臯檢校右僕射以司農少卿裴延齡爲戶部侍郎判度支庚申以給事中李衡爲戶部侍郎諸道鹽鐵轉運使秋七月乙未敕縣令以四考爲限無替者宜至五考庚子以信州刺史孫公器爲邕管經畧使故事宰相秉筆決事每人十日一易至是賈耽趙憬陸贄盧邁同平章政事百僚有所關白更相讓而不言始詔令旬日秉筆後詔每日更秉筆劍南西川羌女國王楊立志哥鄰王董臥庭白狗王羅

陀念弱水王董避和逋租王弟鄧告知南水王姪尙悉
曩等六國君王自來朝貢六國初附吐蕃韋臯出西山
討吐蕃故六蠻內附各授官敕遣之八月庚戌太尉中
書令西平郡王李晟薨贈太師廢朝五日己巳皇太子
長男廣陵王淳納妃郭氏九月己卯罷九日宴以太師
晟喪也冬十月己酉侍中馬燧對於延英燧足疾詔令
不拜行仆於地命宦者扶持之上謂之曰前日卿與太
尉晟俱來今公獨至因歔欷泣下及燧退上送及階癸
酉環王國獻犀牛上令見於太廟十一月癸未朝獻於太清宮甲申
朝享於太廟乙酉日南至上親郊園丘是日還宮御丹鳳樓

制曰朕以寡德祇膺大寶勵精理道十有五年夙夜惟寅罔敢自逸小大之務莫不祇勤皇靈懷顧宗社垂祐年穀豐阜荒服會同遠至邇安中外咸若永惟多祐實荷元休是用虔奉禮章躬薦郊廟克展因心之敬獲申報本之誠慶感滋深悚惕惟勵大福所賜豈獨在予思與萬方均其惠澤可大赦天下辛卯華州潼關鎮國軍隴右節度使李元諒卒於良原以其部將阿史那叙統元諒之衆戍良原壬寅河南尹東都留守裴諝卒甲辰制薦官宜令尚書丞郎於都堂訪以理術試時務狀考其通否及歷任考課事迹定爲三等并舉主姓名仍令

御史一人爲監試如授官後政事能否委御史臺觀察使以聞而殿最舉主十二月丙午朔制今後使府判官副使行軍已下使罷後如是檢校試五品以上官不合集於吏部選任準罷使郎官御史例冬季聞奏丙辰宣武軍亂逐節度使劉士寧壬戌以通王諶爲宣武軍節度使以宣武軍節度副使李萬榮爲汴州刺史宣武軍節度汴宋等州觀察留後朔方靈鹽節度副大使太子少師檢校左僕射餘姚郡王杜希全卒

十年春正月乙亥朔乙酉以虔王諒爲朔方靈鹽豐節度大使以朔方等道行軍司馬李樂爲留後壬辰南詔

異牟尋大破吐蕃於神川使來獻捷己亥昭義軍節度使檢校司空同平章事李抱真請降官乃授檢校左僕

射時抱真病巫祝言宜降爵故有是請

表在九年作讓司徒皆誤

二

月丙午以瀛州刺史劉瀛爲秦州刺史隴右經畧軍使理普潤縣仍以普潤軍爲名乙卯以給事中齊抗爲河南尹乙丑義成軍節度使鄭滑觀察使李融卒丁卯詔君臣之際義莫重焉每聞薨殂良深悼惻應文武朝臣薨卒者其月俸料宜全給仍更準本官一月俸料以爲賻贈三月乙亥黃霧四塞日無光以華州刺史李復爲滑州刺史義成軍節度使滄州程懷直來朝賜安業坊

宅妓一人復令還鎮

程日華傳作九年

庚辰南詔異牟尋攻收

吐蕃鐵橋已東城壘一十六擒其王五人降其民衆十

萬口壬申以同州刺史盧徵爲華州刺史潼關防禦鎮

國軍等使辛丑以延州刺史李如暹所部蕃落賜名安

塞軍以如暹爲軍使是春霖雨罕有晴日夏四月

癸卯赦京

城戊申地震癸丑復震恒州奏見巨人迹以雲南告捷

使高細龍爲左武衛將軍是月太白晝見有大鳥飛集

宮中食雜骨六月壬寅朔昭義軍節度使檢校左僕射

同平章事義陽郡王李抱真卒

表在九

詔以其將王延

貴權知昭義軍事癸丑以祠部郎中袁滋兼御史中丞

爲冊南詔使甲寅以辰州刺史房孺復爲容管經畧使

丙寅韋臯奏西山峨和城擊破吐蕃城柵斬首二千八

百級庚午度支使裴延齡兼靈鹽等州鹽池井權使

自春

不雨至於是月辛未晦有水鳥集於左藏庫是夜暴雨大風折

木秋七月壬申朔以邕王諲爲昭義軍節度使以昭義

軍押衙王延貴爲潞府左司馬充昭義軍節度留後賜

名虔休抱眞別將權知洺州事元誼不悅虔休爲留後

據洺州叛陰結田緒庚辰賜南詔異牟尋金印銀窠其

文曰貞元冊南詔印先是吐蕃以金印授南詔韋臯因

其舊而請之汴州軍亂攻節度留後李萬榮不勝而潰

萬榮悉捕斬其孥己亥前汴州節度使劉士寧宜於郴
州安置欽州守鎮黃少卿叛攻邕管經畧使孫公器八
月又陷欽橫潯貴等州吐蕃大將論乞髯湯沒藏悉諾
碑以其家內附授歸德將軍因置四品己下武官以授
四夷歸附者仍定懷化大將軍己下俸錢九月辛未朔
以袁州刺史董鎮爲邕管經畧使戊子

疑戊寅

賜百僚九

日宴上賦詩賜之辛卯南詔獻鐸槃浪人劍吐蕃印八

紐戊戌定州張昇雲改名茂昭冬十月癸卯御宣政殿

試賢良方正能直言極諫等舉人壬戌刑部尙書劉滋

卒

昭義軍節度留後王虔休及攝
洛州刺史元誼戰於雞澤敗之

十一月乙酉諸道鹽

鐵轉運使張滂爲衛尉卿以浙西觀察使王緯爲諸道

鹽鐵轉運使庚寅祕書監致仕穆寧卒十二月庚子朔

丙辰獵於城南壬戌貶中書侍郎同平章事陸贄爲太子賓客

十一年春正月庚午朔乙亥嶺南節度使薛珣卒

遷盧邁爲

中書侍郎乙未以祕書少監王礎爲黔中經畧觀察使衛尉

少卿武少儀爲邕管經畧使丙申以邕管

案傳當作容管

經畧

使王鏐爲廣州刺史嶺南節度使二月癸卯以衢州刺

史李若初爲福建觀察使乙巳冊渤海大欽茂之子嵩

璘爲渤海郡王忽汗州都督乙卯於涇州彰信堡置潘

原縣甲子九姓迴紇骨咄祿毗伽奉誠可汗卒三月庚

午司徒兼侍中馬燧以疾請罷侍中不許辛未賜宰臣

兩省供奉官宴於曲江亭乙丑

案是月無乙丑誤

以吏部侍郎

鄭珣瑜爲河南淮南水陸轉運使丙申諸州準例薦隱

居邱園不求聞達蔡廣成等九人各授試官令給公乘

到京日量才叙用夏四月旱壬戌貶太子賓客陸贄爲

忠州別駕京兆尹李元信州長史衛尉卿張滂汀州長

史癸亥以兵部侍郎韓臯爲京兆尹甲子賜南詔敕書

始列中書三官奉宣行復舊制也丙寅幽州劉濟奏大

破奚王啜刺等六萬餘衆

奚寇平州劉濟敗之於青都山

五月丁卯朔

庚午命有司慮囚旱故也丁丑以宣武軍留後李萬榮

爲汴州刺史宣武軍節度副使知節度事以昭義軍節度留後王虔休爲潞州大都督府長史昭義軍節度副大使知節度事管內度支營田潞澤磁邢洺觀察使以朔方留後李欒爲靈州大都督府長史朔方靈鹽豐夏四州受降定遠城天德軍節度副大使知節度事管內度支營田觀察押蕃落等使甲申河東節度使檢校工部尚書太原尹李自良卒庚寅遣使冊九姓迴紇騰里羅羽錄沒密施合胡六骨咄祿毗伽懷信可汗癸巳以通王諶爲河東節度使以河東行軍司馬李說爲河東節度營田觀察留後北都副留守甲午初鑄河東監軍

印監軍有印自王定遠始也六月河陽獻白鳥甲辰晉
慈隰觀察使崔漢衡卒癸丑以絳州刺史姚齊梧爲晉
慈隰都防禦觀察使秋七月丙寅朔右諫議大夫陽城
爲國子司業河東監軍王定遠配流崖州坐專殺也辛
卯江西觀察使齊映卒八月辛亥司徒兼侍中北平郡
王馬燧薨贈太傅丙辰以楚州刺史路寔爲洪州刺史
江西觀察使閏月己丑國子司業裴澄表上乘輿月令
十二卷理典十二卷九月癸卯賜宰臣兩省供奉官宴
於曲江賦詩六韻賜之丁巳加韋臯統押近界諸蠻及
西山八國雲南安撫等使滄州大將程懷信逐其帥程

懷直冬十月丁丑以虔王諒爲橫海軍節度大使以兵

馬使程懷信爲留後

朗蜀二州江溢

十一月丙申日南至不受

朝賀以司徒馬燧葬也辛丑太常定馬燧諡曰景武上
曰景太祖諡改莊武可也已酉潭州獻赤烏十二月戊
辰上獵苑中戒多殺止行三驅之禮勞士而還

十二年春正月甲午朔庚子元誼李文通率洺州兵五
千民五萬家東奔田緒壬子以前滄州節度使程懷直
爲左龍武統軍二月乙丑成德軍

案渾瑊未嘗鎮成德誤當作河中

節

度使檢校司徒兼侍中渾瑊兼中書令興元節度使嚴
震魏博田緒西川韋臯並加檢校左右僕射同中書門

下平章事於是方鎮皆叙進兼官上制貞元廣利藥方

五百八十六首頒降天下

吐蕃寇雋州刺史曹高仕敗之

三月癸巳朔

甲午韋臯奏收降蠻七千戶得吐蕃所賜金字告身五

十五片乙巳以戶部侍郎裴延齡爲戶部尚書戊申以

兵部尚書董晉充東都留守判東都尚書省事東畿汝

都防禦使

丙辰詔王暹薨

夏四月壬戌朔戊辰左右十軍使奏

去年冬車駕幸諸營欲於銀臺亭子門外立碑以紀聖

迹從之庚午魏博節度使度支營田觀察使檢校左僕

射同平章事魏州長史駙馬都尉鴈門郡王田緒卒

其子

季安自稱留後

庚辰上降誕日命沙門道士偕文儒官討論三

教上大悅五月辛卯朔丙申邠寧節度使張獻甫卒甲辰以邠寧都虞候楊朝晟爲邠州刺史邠寧慶節度使銀夏節度使韓潭讓所授禮部尙書乞雪崔寧許其家收葬丁巳駙馬郭曖王士平曖弟煦暄坐代宗忌辰飲宴貶官歸第六月壬戌故驩州司戶竇參許其家收葬乙丑初置左右護軍中尉監中護軍監以授宦官以左右神策軍使竇文場霍僊鳴爲左右神策護軍中尉監以左右神威軍使張尙進焦希望爲左右神威中護軍監辛巳宣歙觀察使劉贊卒秋七月乙未以東都留守兵部尙書董晉檢校左僕射同中書門下平章事汴州

刺史宣武軍節度使宋毫穎觀察使時李萬榮病萬榮

子迺白署爲兵馬使軍人又逐迺新書伏誅汴州亂故命董

晉帥之以太子賓客王翊爲東都留守判東都尙書省

事東畿汝都防禦使是月新書在六月己丑汴州節度使李萬

榮卒戊戌韓王迺薨八月己未朔日有食之己巳以前魏博節

度副使田季安爲魏州長史魏博節度觀察等使庚午

增修望仙門廣夾城十王宅六王宅癸酉以虢州刺史

崔衍爲宣歙池觀察使以乞髯子湯忠義爲歸德將軍

丙子以汝州刺史陸長源爲宣武行軍司馬丙戌門下

侍郎同平章事趙憬薨九月甲午以河東行軍司馬李

景畧爲豐州刺史天德軍豐州西受降城都防禦使丙
午戶部尙書判度支裴延齡卒庚戌幸魚藻宮卽日還
內壬子吐蕃寇慶州冬十月壬戌詔以京畿旱放租稅
甲戌右諫議大夫崔損給事中趙宗儒並同中書門下
平章事俱賜金紫以少府監崔穆爲晉州刺史晉慈隰
觀察使十一月辛卯昭義王虔休造誕聖樂曲以獻十
二月己未大雪平地二尺竹栢多死環王國所獻犀牛
甚珍愛之是冬亦死上著刑政箴一首癸未迴紇南詔
劍南西山國女國王並來朝賀

十三年春正月戊子朔庚寅太子少師致仕關播卒壬

寅吐蕃贊普遣使修好塞上以聞上以犬戎負約不受
其使東都尚書省火二月丁巳賜宰臣兩省供奉官宴
於曲江亭乙亥度支郎中蘇弁爲戶部侍郎判度支兵
部郎中王紹判戶部三月戊子造會慶亭於麟德殿前
乙巳以福建都團練使李若初爲越州刺史浙東觀察
使以婺州刺史柳冕爲福建觀察使夏四月辛酉以壬
戌上幸興慶宮龍堂祈雨乙丑大雪庚午義成軍節度
鄭滑觀察營田使檢校左僕射滑州刺史李復卒己卯
以大理卿于頔爲陝州長史陝虢觀察使庚辰以陝虢
都防禦觀察轉運等使姚南仲爲滑州刺史義成軍節

度鄭滑觀察使五月丙戌朔韋臯收復嶠州畫圖來上

壬子以庫部郎中翰林學士鄭餘慶爲工部侍郎知吏

部選事

壬寅吐蕃寇嶠州曹高仕敗之庚戌義寧軍亂殺其將常楚客

六月乙卯朔以

衡州刺史陳雲爲邕管經畧使辛巳引龍首渠水自通

化門入至太清宮前壬午韋臯奏於嶠州破吐蕃生擒

大籠官士人馬畜器械不可勝紀

案吐蕃傳此卽新書五月壬寅之戰舊書

據其奏到之日耳

秋七月丙戌宰相盧邁請告累月四表避相

位是日命宰臣問疾於盧邁私第己丑右神策中尉霍

僊鳴病賜馬十匹令於諸寺齋僧壬辰浚湖渠魚藻池

深五尺乙未地震甲辰以兵部郎中判戶部王紹爲戶

部侍郎判戶部乙丑

案是月無乙丑誤

詔今後嗣王薨葬所司

並供鹵簿永爲常式八月丁巳詔京兆尹韓臯修昆明池石炭賀蘭兩堰兼湖渠壬午容管經畧使房孺復卒九月己丑盧邁懇讓相位乃授太子賓客辛卯九日宴宰臣百官於曲江上賦詩以賜之乙未江西觀察使路寔卒甲辰升定州爲大都督府以湖南觀察使李巽爲江州刺史江西觀察使以禮部侍郎呂渭爲潭州刺史湖南觀察使冬十月癸丑朔以前滁州刺史房濟爲容管經畧使丙辰黔中觀察使奏溪州人戶訴被前刺史魏從琚於兩稅外每年加進朱砂一千斤水銀二百駄

民戶疾苦請停從之淮西吳少誠擅開刀溝河汝河詔使不能禁癸酉宰相賈耽以疾避相位不允丁丑徐泗節度使張建封來朝上嘉之次日於延英召對十一月癸巳贈太傅馬燧祔廟命所司供少牢祭仍給鹵簿從宅至廟十二月庚辰右龍武統軍韓遊瓌卒

十四年春正月壬午朔庚寅詔諸道州府應貞元八年至十一年兩稅及權酒錢在百姓復內者總五百六十七萬七千貫並除放甲午敕比來朝官或相過從金吾皆上聞其間如是親故或嘗同僚伏臘歲時須有還往亦人倫常禮今後不須奏聞因張建封奏議也二月壬子

朔戊午上御麟德殿宴文武百僚初奏破陣樂徧奏九
部樂及宮中歌舞妓十數人列於庭先是上製中和樂
舞曲是日奏之日宴方罷比詔二月一日中和節晏以
雨雪改用此日上又賦中春麟德殿宴羣臣詩八韻羣
臣頒賜有差乙亥賜光蔡節度曰彰義軍三月丙申右
神策行營節度鳳翔隴右觀察使檢校右僕射鳳翔尹
邢君牙卒以右神策將軍張昌爲鳳翔尹右神策行營
節度鳳翔隴右觀察使仍改名敬則鳳翔監軍使西門
去奢殺其將夏侯
衍夏四月乙丑表丁丑以左諫議大夫同平章事崔損爲
修奉八陵使先是昭陵寢殿爲火所焚至是獻昭乾定

泰五陵各造屋三百八十間橋元建三陵據闕補造五

月庚辰朔甲午前東都留守東畿汝都防禦使檢校吏

部尚書杜亞卒丙午戶部侍郎判度支蘇弁爲太子詹

事上特召度支郎中于頔於延英兼御史中丞賜金紫

令判度支己酉閏月辛亥有星庚申以左神策行營節

度使韓全義爲夏州刺史兼鹽夏綏銀節度使以代韓

潭辛酉長武城軍亂甲子貶太子詹事蘇弁爲汀州司

戶兄贊善大夫袞爲永州司戶前京兆府士曹冕爲信

州司戶六月丙申歸化堡軍亂逐其將張癸卯太子賓

客盧邁卒乙巳以旱儉出太倉粟賑貸秋七月以吉州

刺史杜春爲邕管經畧使乙卯貶京兆尹韓臯爲撫州
司馬召右金吾將軍吳湊於延英面授京兆尹卽令入
府視事是夏熱甚壬申以給事中同平章事趙宗儒爲
太子左表庶子以左諫議大夫同平章事崔損爲門下
侍郎知政事以工部侍郎鄭餘慶爲中書侍郎同中書
門下平章事左神策護軍中尉霍僊鳴卒丁丑以宦者
第五守亮代僊鳴爲中尉八月己卯左右神策置統軍
品秩奉給視六軍統軍例甲午崔損修奉八陵寢宮畢
羣臣於宣政殿行稱賀浙西觀察使王緯卒九月丁未
朔己酉山南東道節度使檢校右僕射襄州刺史樊澤

卒乙卯以同州刺史崔宗爲陝州長史陝虢觀察轉運

使以浙東觀察使李若初爲潤州刺史浙西觀察使及

諸道鹽鐵轉運使以常州刺史裴肅爲越州刺史浙東

觀察使丙辰以陝虢觀察使于頔爲襄州刺史山南東

道節度使丁卯杞王倓薨以太常卿杜確爲同州刺史

本州防禦長春宮使癸酉諫議大夫田登奏兵部武舉

人持弓挾矢數千百人入皇城恐非所宜上聞之瞿然

乃命停武舉冬十月癸酉

案是月無
癸酉誤

以歲凶穀貴出太

倉粟三十萬石開場糴以惠民庚子夏州韓全義奏破

吐蕃鹽州十一月己未韋臯進開西南蠻事狀十卷叙

開復南詔之由十二月戊子太子少師致仕郢國公韋

倫卒癸酉

案是月無
癸酉誤

出東都含嘉倉粟七萬石開場糶

以惠河南饑民己亥南詔異牟尋遣使賀正旦

壬寅

明州

鎮將栗鐸殺刺史盧雲

是冬
無雪

十五年春正月丙午朔甲寅雅王逸薨

壬戌郴州
藍山崩

甲戌

浙西觀察使李若初卒二月罷中和節宴會年凶故也

丁丑宣武軍節度使檢校左僕射同平章事汴州刺史

董晉卒乙酉以行軍司馬陸長源檢校禮部尚書汴州

刺史御史大夫宣武軍節度度支營田汴宋毫潁觀察

等使以常州刺史李錡爲潤州刺史浙西觀察使及諸

道鹽鐵轉運使是日汴州軍亂殺陸長源及節度判官
孟叔度邱穎軍人鬻而食之監軍俱文珍以宋州刺史
劉逸準久爲汴之大將以書招之俾靜亂已丑以宋州

刺史劉逸準檢校工部尚書汴州刺史宣武軍節度使
仍賜名全諒乙未裴肅奏於台州擒栗鎰以獻斬於獨

柳樹

新書在四月乙未

癸卯罷三月羣臣宴賞歲饑也出太倉

粟十八萬石糶於京畿諸縣三月甲寅吳少誠寇唐州
殺監軍邵國朝掠居民千餘而去

守將張嘉瑜死之

丁巳以度

支郎中兼御史中丞于頔爲戶部侍郎依前判度支戊
午昭義軍節度使檢校工部尚書王虔休卒戊辰以河

陽三城節度使李元爲潞州長史昭義軍節度澤潞磁邢洺觀察使以河陽節度押衙衡濟爲懷州刺史河陽三城懷州節度使辛未太子少師致仕于頔卒壬申於易州滿城縣置永清軍癸酉令江淮歲運米二百萬石雖有是命然歲運不過四十萬石夏四月丁丑以久旱令陰陽人法術祈雨壬午內侍省加置內給事二員癸未以安州刺史伊慎爲安黃節度營田觀察使庚寅應京城內外諸軍縣鎮職員官見共五萬八千二百七十一人宜令每人賜粟一石乙未特進兵部尚書歸崇敬卒五月甲辰朔戊辰宗正卿嗣吳王嘯薨六月己卯黔

中觀察使御史中丞王礎卒癸巳山南西道節度使檢
校左僕射同平章事嚴震卒秋七月乙巳以興州刺史
興元都虞候嚴礪爲興元尹兼御史大夫山南西道節
度度支營田觀察等使丙午故唐安公主賜諡曰莊穆

新書公主
傳貞穆

公主賜諡自唐安始也丁未以王礎廢朝一

日觀察使卒廢朝自礎始也戊午貶諫議大夫苗拯萬
州刺史左拾遺李繁播州參軍以私議除拜嚴礪不當
而無章疏而僞言累上疏故也鄭滑大水八月壬申朔
丙申陳許節度使檢校右僕射許州刺史曲環卒丁酉
以洋州刺史韋士宗爲黔中觀察使九月丙午以陳許

兵馬使前陳州刺史上官況爲許州刺史陳許節度使
吳少誠謀逆漸甚陷臨潁進圍許州庚戌宣武軍節度
使檢校工部尙書汴州刺史劉全諒卒

都知兵馬使韓
宏自稱留後

丙辰制吳少誠非次擢用授以節旄秩居端揆之榮任
總列城之重期申報效奉我典章而秉心匪彝自底不
類兇狡成性扇構多端擅動甲兵暴越封壤壽州茶園
輒縱凌奪唐州詔使僭構殺傷干犯國章罪在無赦朕
以王者之德在乎好生人君之體務於含垢寧屈己以
宥罪不殘人以興師是以上稽宗社之威外抑忠賢之
請庶有悛革尙議優容幸鄰境之喪逞貪亂之志焚畧

縣邑殘暴吾民朕猶冀知非爲之忍恥亟頒恩命未許

出師至乃攻逼許州肆其蠱毒恣行殺戮流害黎蒸惡

稔禍盈人神同棄興言致討實悼於懷宜令諸道各出

師徒犄角齊進吳少誠在身官爵並宜削奪宣武河陽鄭滑東都

汝成德幽州淄青魏博易定澤潞河東淮南徐泗山南東西鄂岳軍討吳少誠己巳自今中和

重陽二節每節只禁屠一日辛酉以大理評事宣武軍

都知兵馬使韓宏檢校工部尙書汴州刺史御史大夫

宣武軍節度使冬十月己丑邕王諫薨吏部侍郎奚陟

卒十一月乙巳冬至罷朝會兵興也丁未山南東道節度使于頔及吳少

誠戰於吳房敗之陳許節度使上官悅又敗之王子襄於柴籬辛亥安黃節度使伊慎又敗之於鍾山

州于頔奏於朗山破淮西賊三千人十二月庚午

壽州刺史

王宗又敗之於秋柵

朔方等道副元帥河中絳州節度使檢校司

徒兼中書令渾瑊薨

新書辛未

乙未戰淮西賊於小澱河王

師不利諸軍自潰丁酉以同州刺史杜確爲河中尹河

中絳州觀察使

十六年春正月庚子朔乙巳恒冀定州許河陽四鎮之

師與賊戰皆不利而退南詔獻奉聖樂舞曲上閱於麟

德殿前二月乙酉以左神策行營銀夏節度使韓全義

爲蔡州行營招討使陳許節度使上官泚副之己丑左

龍武統軍程懷直卒三月己酉華州刺史潼關防禦鎮

國軍使盧徵卒王子以尚書右丞袁滋爲華州刺史潼

關防禦鎮國軍使夏四月丁亥黔中知宴設吏傅近逐

觀察使韋士宗己丑以昭義軍案南仲乃義成非昭義誤節度使姚

南仲爲右僕射以權知新羅國事金俊邕襲祖開府檢

校太尉雞林州都督新羅國王辛卯以義成行軍司馬

盧羣爲滑州刺史兼御史中丞義成軍節度使壬申案是月無

王申誤檢校兵部尚書京兆尹吳湊卒五月戊戌朔以雨

罷朝庚戌韓全義與蔡賊吳少誠戰於澥水南廣利城王

師敗績徐泗濠節度使檢校右僕射徐州刺史張建封

卒壬子徐州軍亂不納行軍司馬韋夏卿迫建封子悛

爲留後丙寅韋士宗却入黔州丁卯以吏部侍郎顧少

連爲京兆尹六月丙午

案是月無丙午誤

鄆州李師古淮南杜

佑並加同平章事以佑兼領徐泗濠節度使以前虢州

參軍張愔起復驍衛將軍徐州刺史御史中丞本州團

練使知徐州留後秋七月湖南觀察使呂渭卒

丁巳伊慎及吳

少誠戰於申州敗之己未韋臯克吐蕃末恭城丙寅韓全義及吳少誠戰於五樓敗績

八月癸酉

以河中尹王

名缺

爲潭州刺史湖南觀察使

劉濟及其弟涿州刺史源

戰於涿州源敗執之己丑殺遂州別駕崔位韋臯克吐蕃臨城

九月宥吳少誠駙馬都

尉郭曖卒義成軍節度使盧羣卒丙午前太常卿裴郁

卒戊申以左丞李元素爲滑州刺史兼御史大夫義成

軍節度使庚戌貶中書侍郎同平章事鄭餘慶爲郴州
司馬戶部侍郎判度支于頔爲泉州司戶以戶部侍郎
王紹判度支以戶部郎中崔從質爲戶部侍郎癸丑賊
吳少誠迫官軍澱水砦下營韓全義退保陳州諸軍散
還本道官軍不振以河南少尹張式爲河南尹水陸轉
運使庚申以太常卿齊抗爲中書侍郎同中書門下平
章事癸亥以虔王諒爲徐州節度使張愔爲留後冬十
月辛未興元嚴礪希監軍旨誣奏流人通州別駕崔河
圖長流崖州賜死人士傷之吳少誠引兵歸蔡州上表
待罪戊子詔雪吳少誠復其官爵己丑河東節度使檢

校禮部尚書太原尹兼御史大夫北都留守李說卒甲
午以河東行軍司馬鄭儋檢校工部尚書太原尹河東
節度使十一月癸卯泗州濠州宜隸淮南觀察使戊申
以太府卿韋渠牟爲太常卿十二月戊寅罷吏部復考
判官及禮部別頭貢舉

是歲京師饑

十七年春正月甲午朔甲寅韓全義自蔡州行營還詔
歸鎮華州二月癸巳朔賜羣臣宴於曲江亭上賦中和
節賜宴曲江詩六韻賜之丁酉雨雹己亥雨霜

乙巳韋
阜及吐

蕃戰於鹿
危山敗之

戊申夜雷震雨雹庚戌大雨雪兼雹三月乙

丑賜羣臣宴於曲江亭己巳黔中觀察使韋士宗復爲

三軍所逐癸酉衢州刺史鄭式瞻進絹五千疋銀二千兩上曰式瞻犯賊已詔御史按問所進宜付左藏庫丁丑省天下州府別駕司馬田曹參軍京兆河南太原三府外諸府判司雙曹者省一夏四月丁未始命駙馬及郡縣主壻無子者養男不用母蔭辛亥以諫議大夫裴佖爲黔中觀察使五月壬戌朔日有食之乙酉邠寧節度使檢校工部尙書邠州刺史楊朝晟卒丙戌以工部侍郎趙植爲廣州刺史兼御史大夫嶺南節度使六月

丙申寧州軍亂殺其刺史劉南金

戊戌以定平鎮兵馬使李朝案檢校

工部尙書兼邠州刺史朔方邠寧節度使以中官楊志

廉爲右神策護軍中尉己亥浙西人崔善真詣闕上書論

浙西觀察使李錡罪狀上覽奏不悅令械善真送於李

錡錡爲鑿坑待善真旣至和械推而埋之由是錡恣橫

致叛己酉以邠寧兵馬使高固爲邠州刺史兼御史大

夫邠寧慶節度使丁巳成德軍節度恒冀深趙德棣觀

察等使恒州大都督府長史檢校太尉中書令琅邪郡

王王武俊薨贈太師諡曰忠烈其子士真自稱留後秋七月戊寅

吐蕃寇鹽州辛巳以前成德軍節度副使檢校工部尙

書知恒州事清河郡王王士真起復授恒州長史充成

德軍節度使乙酉太常卿韋渠牟卒己丑吐蕃陷麟州

殺刺史郭鋒毀城壘而去

隕霜殺菽。五行志無。

八月戊午以河

東行軍司馬嚴綬檢校工部尚書兼太原尹御史大夫

河東節度使九月壬戌韋臯奏大破吐蕃於雅州

克木波城

戊辰羣臣宴曲江亭上賦九日賜宴曲江亭詩六韻賜

之丁丑禮部尚書李齊運卒冬十月加韋臯檢校司徒

中書令封南康郡王賞破吐蕃功也戊午鹽州刺史杜

彥先委城奔慶州十一月辛未宰相賈耽上海內華夷

圖及古今郡國縣道四夷述四十卷甲戌翰林待詔戴

少平死十六日復生十二月庚戌以京兆尹顧少連爲

吏部尚書以吏部侍郎韋夏卿爲京兆尹淮南節度使

杜佑進通典凡九門共二百卷

是歲嘉王運薨

十八年春正月戊午朔大雨雪罷朝賀乙丑驃國王遣使悉利移來朝貢并獻其國樂十二曲與樂工三十五人乙亥韋臯以所擒蕃相論莽熱來獻庚辰以常州刺史賈全爲越州刺史浙東觀察使二月戊子朔賜羣臣宴於馬璘之山池三月己未以劍南東川行軍司馬李康爲梓州刺史兼御史大夫劍南東川節度使乙丑賜羣臣宴於馬璘之山池己巳以蘄州刺史鄭紳爲鄂州刺史鄂岳蘄沔觀察使癸酉以浙東團練副使齊總爲衢州刺史總以橫賦進奉希恩給事中許孟容封還制

書丙戌以河中行軍司馬鄭元爲河中尹兼御史大夫
河中絳節度使夏五月癸亥以竇羣爲左拾遺庚辰以
祠部員外郎裴泰爲檢校兵部郎中充安南都護本管
經畧使六月癸巳以吏部尙書顧少連爲兵部尙書東
都留守東畿汝都防禦使前東都留守檢校禮部尙書
王翊卒秋七月

乙亥罷正
衙奏事

庚辰蔡申光三州春水夏旱

賜帛五萬段米十萬碩鹽三千碩八月壬寅以邕管經
畧使徐申爲廣州刺史嶺南節度使甲辰以嶺南節度
掌書記試大理評事張正元爲邕州刺史御史中丞邕
管經畧使給事中許孟容以非次賜授封還詔書丁未

以戶部侍郎判度支王紹爲戶部尙書判度支九月乙卯朔以太常少卿楊憑爲潭州刺史湖南觀察使癸亥賜羣臣宴於馬璘山池上賦九日賜宴詩六韻賜之冬十月丁亥以刑部尙書王鏐爲淮南節度副使兼行軍司馬己酉鄜坊丹延節度使檢校禮部尙書王栖曜卒十一月丙辰以同州刺史劉公濟爲鄜州刺史鄜坊丹延節度使十二月乙巳貶大理卿李正臣爲衛尉少卿正臣爲御史彈劾下獄不堪其辱而死戊申黎州蠻牂牁使入朝

環王陷驩
愛二州

十九年春正月癸丑朔二月壬午朔賜宴馬璘山池丁

亥修含元殿賜安黃節度曰奉義軍丙申以桂管留後

韋武爲桂州刺史桂管觀察使己亥安南經畧使裴泰

爲州將王季元所逐

兵馬使趙均敗之

甲辰淮南節度使杜佑

來朝三月壬子朔以杜佑檢校司空同中書門下平章

事太清宮使以淮南行軍司馬王鏐檢校右僕射兼揚

州長史淮南節度使丁卯以今年孟夏禘饗前議太祖

懿獻之位未決至此禘祭方正太祖東向之位已下列

序昭穆其獻祖懿祖祔於德明興聖之廟每禘祫年就

本室饗之乙亥以司農卿李實爲京兆尹夏四月乙未

涇原節度使劉昌奏請移行原州爲平涼城從之戊戌

百官以耐廟畢蹈舞稱賀五月辛亥荆南節度使檢校
工部尚書江陵尹裴胄卒己未以荆南行軍司馬裴均
爲江陵尹兼御史大夫荆南節度使甲子四鎮北庭行
軍涇原節度使檢校右僕射涇州刺史劉昌卒甲戌以
涇原節度留後段佑爲涇州刺史兼御史大夫四鎮北
庭行軍涇原節度使乙亥吐蕃遣使論頻熱入朝六月
甲辰以陳許行軍司馬劉昌裔檢校工部尚書兼許州
刺史陳許節度使自正月至是未雨分命祈禱山川秋
七月以關輔饑罷吏部選禮部貢舉己未中書侍郎同
平章事齊抗爲太子賓客病免也甲戌始雨乙亥尚書

右僕射姚南仲薨貸京畿民麥種八月乙未大雨霖冬

十月乙未以太子賓客韋夏卿爲東都留守東畿汝都

防禦使閏月

庚戌鹽州將李庭俊反伏誅

丁巳門下侍郎同平章事

崔損卒

表閏十一月誤

十一月戊寅朔以鹽州兵馬使李興幹

爲鹽州刺史許專達於上不隸夏州丙午振武麟勝節

度使范希朝來朝十二月戊午以振武行軍司馬閻巨

源檢校工部尙書兼單于大都護振武麟勝節度使庚

申以太常卿高郢爲中書侍郎同中書門下平章事

吏部

侍郎鄭珣瑜爲門下侍郎同中書門下平章事

壬申監察御史崔遠入臺近不

練故事違式入右神策軍上怒笞四十配流崖州

二十年春正月丁丑朔丙申天德軍防禦團練使豐州
刺史李景畧卒以其判官任迪簡代領其任己亥以鄆
坊丹延節度使劉公濟爲工部尙書以其行軍司馬裴
玢代領其任二月丙午朔罷中和節宴歲儉也庚戌大
雷震雨雹三月甲申以吐蕃贊普卒廢朝己亥以國子
祭酒趙昌爲安南都護御史大夫本管經畧使夏四月
辛酉太子賓客齊抗卒丙寅吐蕃使臧文關河南觀察使
河南下五字疑錯簡衍文論乞冉等五十四人來朝貢陳許節度賜
號忠武軍五月甲戌朔御宣政殿乙亥以史館修撰祕
書監張薦爲工部侍郎兼御史大夫充入吐蕃弔祭使

秋七月癸酉朔大雨雹

五行志無

辛卯福建觀察使柳冕奏

置萬安監牧於泉州界置羣牧五悉索部內馬牛羊近
萬頭匹監吏主之八月戊申以房州刺史郗士美爲黔
中觀察使己未以昭義兵馬使盧從史檢校工部尙書
兼潞州長史昭義軍節度澤潞磁邢洺觀察使九月庚
辰賜羣臣宴於馬璘山池冬十月甲辰於景州南皮縣
置唐昌軍辛亥易定節度使張茂昭來朝十一月丁酉
以監察御史李程祕書正字張聿藍田縣尉王涯並爲
翰林學士十二月吐蕃南詔日本國並遣使朝貢庚午
以桂管防禦使顏証爲桂州刺史桂管觀察使

冬雨木冰

二十一年春正月辛未朔御含元殿受朝貢是日上不
康丙子以浙東觀察判官凌準爲翰林學士癸巳會羣
臣於宣政殿宣遺詔皇太子宜於柩前卽位是日上崩
於會寧殿享壽六十四甲午遷神柩於太極殿丙申發
喪羣臣縞素皇太子卽位永貞元年九月丁卯羣臣上
謚曰神武孝文廟號德宗十月己酉葬於崇陵昭德皇
后王氏祔焉

史臣曰德宗皇帝初總萬機勵精治道思政若渴視民
如傷凝旒延納於讜言側席思求於多士其始也去無
名之費罷不急之官出永巷之嬪嬙放文單之馴象減

大官之膳誠服玩之奢解鷹犬而放伶倫止摧酷而絕
貢奉百神咸秩五典克從御正殿而策賢良輟廷臣而
治畿甸此皆前王之能事有國之大猷率是而行夫何
敢議加以天才秀茂文思雕華灑翰金鑾無愧淮南之
作屬辭鉛槧何慙壠坻之書文雅中興實高前代二南
三祖豈盛於茲然而王霸迹殊淳醜代變揆時而理斟酌
斯難苟於交喪之秋輕取鄙夫之論歷觀近世靡不
敗亡德宗在藩齒胄之年曾爲統帥及出震承乾之日
頗負經綸故從初罷郭令戎權非次聽楊炎謬計遂欲
混同華裔束縛奸豪南行襄漢之誅北舉恒陽之伐出

車雲擾命將星繁罄國用不足以餽軍竭民力未聞於
破賊一旦德音埽地愁歎連薨果致五盜僭擬於天王
二朱憑陵於宗社奉天之窘可爲涕零罪己之言補之
何益所賴忠臣戮力否運再昌雖知非竟逐於楊炎而
受佞不忘於盧杞用延賞之私怨奪李晟之兵符取延
齡之奸謀罷陸贄之相位知人則哲其若是乎貞元之
辰吾道窮矣

贊曰聰明文思惟睿作聖保姦傷善聽斷不令御厯三
九適逢天幸賜宴之辰徒矜篇詠

新書贊曰德宗猜忌刻薄以強明自任耻見屈於正
論而忘受欺於姦諛故其疑蕭復之輕已謂姜公輔

賣直而不能容用盧杞趙贊則至於敗亂而終不悔
及奉天之難深自懲艾遂行姑息之政由是朝廷益
弱而方鎮益強至於唐亡其患以此憲宗剛明果斷
自初卽位慨然發憤志平僭叛能用忠謀不惑羣議
卒收成功自吳元濟誅強蕃悍將皆欲悔過而効順
當此之時唐之威令幾於復振則其爲優劣不待較
而可知也及其晚節信用非人不終其業而身罹不
測之禍則尤甚於德宗嗚呼小人之能敗國也不必
愚君闇主雖聰明聖智苟有感焉未有不爲患者也
昔韓愈言順宗在東宮二十年天下陰受其賜然享
國日淺不幸疾病莫
克有爲亦可以悲夫

唐書卷第十三